

Minister Andin Bikker y Minister Glenbert Croes kier claridad riba caso di Mitch Henriquez



Minister di Husticia mr. Andin Bikker den presencia di Minister sr. Glenbert Croes tin un carta cla pa Minister di Husticia di Hulanda Ferdinand Grapperhaus riba e caso di Mitch Henriquez den feliz memoria.

Durante conferencia di prensa di Gobierno, Minister Bikker den e carta ta pidi Gobierno di Hulanda specialmente e Minister encarga cu Husticia pa duna un splicacion riba e caso.

Pa Minister Bikker e siman aki a sali un noticia alarmante caminda cu Justitie Veiligheid lo a pidi pa suavisar cierto raportnan y tres a keda menciona. Uno di nan ta regarda e caso di Mitch Henriquez y e famia ta hopi indigna cu esaki.

E esencia di e peticion na Minister di Husticia di Hulanda ta, pa aclaria esaki y pa Gobierno di Aruba haya e documento den su totalidad cu originalmente y aparentemente lo tabatin otro contenido.

Tanto pa Gobierno di Aruba como e famia, kier haya sa kico especificamente lo a adapta den e raport.

Tabata na 2015 tempo cu Minister Bikker y Minister Croes tabata den Parlamento, comunidad di Aruba a keda conmovi cu un noticia, un ciudadano di Aruba na Hulanda sr. Mitch Henriquez a haya su mes den un situacion cu Polis caminda a uza forza contra dje cu consecuencia cu el a fayece. Tabatin casonan den Corte contra e Polisnan involvi y finalmente algun di nan a haya castigo.

E caso awor a bay te Europeen Hof van Justitie y ta keda uno doloroso y e famia ta bibando cu esaki.

Despues cu Minister Glenbert Croes a tuma nota di e noticia alarmante, mesora el a tuma contacto cu Minister di Husticia. Andin Bikker na su turno a mostra Glenbert Croes e articulo cu el a haya di prensa y a dici mesora di formula un carta pa manda pa Minister di Husticia di Hulanda.

Tanto Minister Bikker como Minister Croes kier haya copia di e raport completo riba e caso unda prensa a mostra cu e raport a wordo adapta. Tur esaki ta doloroso p'e famia y preocupante pa Gobierno di Aruba y esey ta haci cu kier mas claridad.